

東

華

錄

東華錄

康熙二十八

臣王先謙敬編

臣周潤蕃恭校

秋七月癸丑轉陳一炳爲刑部左侍郎以杜臻爲刑部右侍郎候補

侍○丁巳諭大學士等刑部關繫民命必擇精敏才幹者始克勝

任禮部尙書郭四海向在兵部具有才能今令其以禮部尙書銜

管刑部事○湖廣提督徐治都奏逆賊譚天祕已離桃花洞於六

月二十四日前赴四川陝西總督哈占軍前投誠○庚申戶部議

覆四川巡撫杭愛奏蜀省久爲賊踞百姓逃亡所存惟兵各弁兵

竟有強占民田抗賦不納者今逆孽漸平若不急行清理勢必仍

踵故轍查四川通省地方向係肥饒而所徵錢糧甚少良由文武

官員兵丁占種民田今逃亡漸歸如有承認原田者應令退還給

民如仍行強占者照例治罪惟開墾年久無主承認者許令自首
輸課免其從前隱漏之罪從之○辛酉定遠平寇大將軍貝子章
泰等奏都統希福提督榮峨率兵往楚雄追勦逆賊馬寶至烏木
山賊據險以拒我兵奮擊大敗之擒斬甚眾馬寶越山而遁僅以
身免下部議敘○壬戌大學士等以三法司奏讞盜案請旨上
曰朕常於刑部人命事情冀其尙有可生之路細加詳閱奈求其
生而不得耳明珠奏曰此乃皇上好生之仁也○甲子諭吏部
兵部凡官員祖母母並妻緣事者卽議鞭責折贖於大體不合如
果事犯重大不妨削其封誥治罪若鞭責折贖小過或將伊夫或
伊子孫品級俸祿議罰爾等會議定例具奏○乙丑兵部議覆廣
東將軍王永譽奏尙之信所屬人員請編爲十五佐領撥入上三
旗從之○勇略將軍雲南貴州總督趙良棟奏總兵官李芳述等

率兵追勦逆賊胡國柱等敗走復建昌得旨嘉獎下部議敘○丙寅諭大學士等近來投誠守備千總等官或帶僞總兵副將劄付卽照伊僞劄反加優敘先用其綠旗官兵於軍前效力顯著者並不得表見淹滯者頗多所在統兵將帥知悉此情者已經回京在彼無人代奏此等官員甚爲屈抑其特行宣諭以示獎勵○丁卯以余三級爲廣東布政使由山東按察使遷○戊辰定遠平寇大將軍貝

子章泰等奏僞國公馬寶僞將軍巴養元等繳印投降於本月初

五日俱至軍前 上諭逆賊馬寶所在抗拒大兵今無地可遁力

窮勢迫始來投誠殊屬可惡所犯情罪重大斷不可宥大將軍貝

子章泰等其執馬寶撥官兵嚴解來京其餘僞屬官兵大將軍如

常發落尋章泰等又率馬寶等背叛國恩臣事吳世璠屢次招撫

不卽悔罪投誠反奔尋甸攜妻子赴楚雄糾集逆黨蹂躪疆圍爲

大兵所敗窮蹙已極方率眾不滿百人往姚安投誠非首先向化歸誠可比僞將軍巴養元趙國祚鄭旺李繼業僞總兵耶應璧等亦與馬寶同在一所若輩宜作何發落一併請旨 上命將巴養元等亦同馬寶執送京師○安塘筆帖式報僞將軍胡國柱王敘等所部賊眾自姚安逃散過半胡國柱等俱遁入山中 上命以此事移知將軍紀哈里噶爾漢趙良棟總督哈占令速行進剿○諭兵部大將軍圖海年老有疾今四川雲南漸次平定可令攜大將軍敕印同鄂克濟哈還京師留將軍吳丹守漢中將軍王輔臣著同圖海來京陛見○庚午以王守才爲內閣學士原任○壬申召大學士以下各部院衙門員外郎以上官員至瀛臺命內大臣佟國維等傳諭曰內閣及部院各衙門諸臣比年以來辦事勤勞今特召集爾等賜宴因朕方駐瀛臺卽以太液池中魚藕等物賜諸

臣共食之又賜綵段表裏大學士率諸臣叩謝各依次坐 上命
內大臣等以金尊賜飲一巡宴畢諸臣各謝恩出○諭吏部兵部
大同地方連年旱荒百姓困苦以致流離失所就食他方因而田
地荒蕪生計不遂今已屢行賑濟蠲免各項錢糧又聞雨澤霑足
秋成有望但饑饉之後安養生全須廉能官吏方能加意招徠留
心撫字見任府州縣衛所等官貪劣不職者照常參處外其才具
平常者該撫酌量更調本省簡僻之缺仍於通省見任官員內選
擇清廉愛民者調補大同所屬地方若果能撫循使戶口充實田
地開墾著有成效該撫特行舉薦該部從優敘錄以副朕獎勵循
良愛養百姓至意○予故雲南巡撫伊闢祭葬○己卯諭議政王
大臣等今諸路逆賊俱已殲除應以見在舟師破滅海賊原任右
都督施琅係海上投誠且曾任福建水師提督熟悉彼處地利海

寇情形可仍以右都督充福建水師提督總兵官加太子太保前往福建到日卽與將軍總督巡撫提督商酌剋期統領舟師進取澎湖臺灣其萬正色改爲陸路提督諾邁還京候補

八月辛巳朔日有食之○甲申理藩院侍郎明愛等以奉遣往遷蘇尼特等被荒蒙古駐近邊八旗蒙古地方請訓 上諭曰此等

蒙古饑饉殊甚故令遷移當聽其徐來不可促之恐斃於道路見今所給牲畜必當節省以備來年之用恐今歲食盡來年禾稼不登又致饑饉爾等前往詳視先所給米穀今年足用則已如不足再行議奏遷移到日交與八旗蒙古分駐善爲撫恤務令得所若不善養以致死亡必將本旗總管議罪朕亦不時遣官往察爾等將此旨傳諭○丁亥以張仲舉爲山東按察使由福建興泉道遷○戊子

福建總督姚啟聖奏臣軍前所轄舟師乃平陽總兵官朱天貴舊

部若令他人統轄恐一時未能馴習且朱天貴聲名素爲海寇所
憚來歸之時已與賊相攻成仇今若令將原軍必能竭力圖報請
敕下浙江總督速發朱天貴並原帶部下精兵三百人至福建同
臣等協力進剿從之○己丑勇略將軍雲南貴州總督趙良棟奏
建昌衛土司安泰甯招聚賊眾逆跡顯然請行剿滅 上諭建昌
地關重要川陝總督哈占將軍王進寶四川巡撫杭愛等多方招
撫土司安泰甯勿致生事若抗拒不服該將軍酌撥官兵速行剿
除○丙申諭刑部商民領吳逆贖本者甚多隱匿者亦或有之若
據告追究恐無賴之徒借此詐害富民有累百姓商人爲四民之
一富民亦國家所庇藏富於民不在計此銖兩以後有首告者應
不准行○丁酉諭刑部凡重案悉歸爾部擬罪關繫緊要早完一
日牽連者得早安一日如遇齋戒不能審結犯人拘繫日久甚苦

亦應於齋戒前速行完結再犯人各有應得之罪今聞爾部柳孔大小不一板有厚薄賄屬者板薄而孔大否則板厚而孔小所帶項鎖亦有輕重又聞爾部發在各門罪婦輒爲門軍污穢恐嚇索詐分外苛擾此等情弊爾等宜親行嚴察禁止○戊戌改貴州平大黔威道爲分巡貴西道轄貴陽安順平大黔甯等處駐安順添設分守貴東道轄鎮遠平越黎平都勻思州銅仁思南石阡等處駐平越○辛丑先是順治十二年間設立喀爾喀入扎薩克每歲獻納年貢羅卜藏台吉其一也康熙元年右翼扎薩克圖汗與羅卜藏台吉等內自相亂扎薩克圖汗旗破身亡而羅卜藏台吉避入厄魯特噶爾丹部下康熙九年特旨以扎薩克圖汗之子襲爲扎薩克圖汗而封阿海台吉之子阿海戴青爲遵義彭楚克台吉授爲扎薩克各賜以敕印獻納年貢至是噶爾丹送羅卜藏台吉

歸扎薩克圖汗扎薩克圖汗以羅卜藏台吉向係扎薩克仍令循舊制入貢奏至 上允之○乙巳 上御經筵○丙午 上幸南苑行圍○戊申以原任福建巡海道陳啟泰全家殉難其子陳汝器赴漳扶柩被劫下海幽囚兩載冒險逃歸父子忠義優贈陳啟泰工部右侍郎旌其妻劉氏各予祭葬如例陳汝器以通政使司左右通政大理寺少卿用○是月免直隸保安霸州山西榆社被災額賦有差

九月辛亥 上巡幸畿甸○先是順治七年定例禁民間房地售與旗下違者房地並價入官至是戶部題查出康熙十七年以前犯禁鬻地之民應追價銀六萬四千餘兩 上命悉豁免之○癸丑故平南王尚可喜喪來自廣東停泊丁字沽遣大臣覺羅塔達等往奠傳諭尚可喜眾子曰王素篤忠貞若人人盡能如王天下

安得有事朕每念王至老懷誠克盡忠盡心甚眷注殊爲傷悼王
停櫬處若近行在朕當親臨酌酒因相去尙遠故特遣大臣塔達
學士庫勒納親隨侍衛敦柱往奠○左副都御史余國柱奏各部
院衙門歲終舉劾者照例處分舉者註冊但旣行五年京察又
有不時指參之例應將每歲年終舉劾之例停止從之○戊午召
霸州知州吳鑑保定縣知縣李文英問曰朕巡幸霸州見地土爲
水淹沒被災若何民生若何吳鑑奏曰今年渾河水決東北三十
餘里西南二十餘里俱被水淹 上曰決口在何處被災幾分爾
將被災之處申報巡撫幾次吳鑑奏曰決口在南孟地方被災十
分九月會報巡撫一次 上曰隄若不修民生必不得安著速爲
修治問李文英曰爾縣內報過巡撫被災幾分李文英奏曰臣縣
內南境幸無水患北境約有四分已報巡撫 上曰朕昨過縣南

境親見尙有積水爾反云未曾被淹何也李文英奏曰境南窪下

向有積水今年並無被災之處 上曰知州知縣最爲親民之官

必忠勤守法愛惜百姓方爲稱職若肆其貪殘貽害地方國家自

有定法也○庚申直隸巡撫于成龍詣行宮請安 上召入密詢

百姓生業地方事宜賜以御衣○癸亥卹贈宜山知縣王坤官廕

○丙寅 上還京師○靖逆將軍甘肅提督侯張勇奏蒙古訴稱

邊內番人火其經卷祠廟戮其人民以此舉兵犯邊 上諭大學

士等朕聞吳三桂反叛時我邊內住牧番人於蒙古多爾濟台吉

處附從供應後吳三桂旣平地方安定番人竟將多爾濟台吉祠

廟拆毀經卷焚燒殺戮蒙古人口蒙古以此弄兵若果如此則蒙

古之來蓋亦有故應遣官嚴察如曲在番人將番人嚴懲曲在蒙

古遣使嚴加譴責使邊人心服邊釁無可乘矣可卽遣兵部理藩

院官前往○丁卯兵部議覆撫遠大將軍都統大學士公圖海奏將軍王輔臣自漢中來至西安於八月二十九日病故其婿薛英等請攜骸骨家口往平涼其標下官兵作何區處乞敕部定議查王輔臣所轄官兵原係多事之時添設今四川陝西俱已平定兵宜裁去其官弁聽該督酌量題補王輔臣骸骨家口應送至京師從之○己巳詔停今年秋決○辛未增協理蒙古旗務官○壬申諭戶部積貯爲國家大計歲運漕米充實京倉最爲緊要旗丁人等挽運勤勞宜加存恤朕頃巡幸近畿至通惠河一帶見南漕船旗甲人丁資用艱難生計窘迫深爲可憫若不豫爲籌畫恐其苦累難支以致沿途遲滯貽誤倉儲所關匪細前以軍需浩繁漕運額設錢糧節經裁減今應作何酌復款項爾部詳議具奏尋戶部議覆應復運丁工食銀十五萬兩從之○甲戌議政王大臣等議

素原任總兵官馬寶身受國恩不思報效值逆賊吳三桂反叛首先從逆於各處抗敵官兵及大兵平定貴州圍困雲南省城馬寶尙不迎降後在楚雄大敗無處可奔窮迫已極始行來歸應凌遲處死梟示從之○丁丑兵部題耿昭忠等呈稱家口甚多難以養贍乞照漢軍例披甲食糧既可當差效力又可均贍老幼家口應如所請編爲五佐領令在京佐領管轄每佐領下設驍騎校一員小撥什庫各四名馬甲各五十四名步軍撥入庫兵各十三名此五佐領俱係耿昭忠耿聚忠等屬下不便分晰應將伊等本身一併俱歸入正黃旗漢軍旗下從之○是月免直隸武清等十四縣衛山西大同遼州山東濟甯等州縣被災額賦有差

冬十月癸未偏沅巡撫韓世琦奏臣與鎮臣和山盧崇耀等於九月十三日會剿古州八萬搖地方逆賊黃明大敗之陣斬僞總兵

蘇養雲等八員兵二千餘名擒僞副將李貴元等九員兵二百九十七名下部議敘○甲申定遠平寇大將軍貝子章泰等奏中甸諸處從來皆隸麗江原爲內地吳逆陰蓄異志於康熙九年割給蒙古此地遠在金沙江外我朝從未遣兵駐守且逆賊胡國柱等復奔鶴慶麗江而雲南省城尙未恢復不便卽議遣發官兵駐守

上諭兵部中甸最爲緊要從前鶴慶麗江雖設總兵官一員令其兼轄中甸但無專汛官兵似猶可慮其移文大將軍貝子章泰賴塔將軍總督趙良棟巡撫王繼文提督桑峨酌量遣撥綠旗官兵前往鎮守俟達賴喇嘛使至理藩院以遣兵鎮守之故移文曉諭○乙酉撫遠大將軍都統大學士公圖海還朝 上召見乾清門嘉勞之○丁亥賑甯古塔災○壬辰宗人府以和碩純親王應否襲爵請旨得旨王以冲年薨逝其子已繼襲爵旋復薨逝朕心

深切軫悼但既無繼嗣不必再議襲封○撤耿精忠尙之信所屬人員還京○癸巳議政王大臣等議奏貝子準達率蒙古兵前赴荊州不卽與順承郡王勒爾錦詳議渡江討賊失誤機會又賊犯鎮荆山不能攻擊致鎮荆山爲賊所據遺棄陣亡兵屍骸副都統蘇虎濟遣人請援不卽遣兵往助屢命進勦逆賊譚宏彭時亨等託故逗遛不行前進準達宜解宗人府左宗正任降貝子爲鎮國公從之○癸卯禮部議覆吐魯番貢物請照康熙十二年例進貢得旨吐魯番地處僻遠犬馬等物嗣後免其進貢○甲辰調陳一炳爲兵部右侍郎由吏部調○乙巳 上幸南苑行圍○丙午理藩院題盜馬罪犯阿畢大等五人應立決家產妻子請給失馬之人上曰朕念人命關繫重大每於無可寬貸之中示以法外得生之路書所謂罪疑惟輕也阿畢大等家產妻子既給失馬之人若本

犯免死給與爲奴則失馬者得人役使於法未爲不當嗣後著爲定例○福建水師提督施琅奏督撫均有封疆重寄今姚啟聖吳興祚俱決意進兵臣職領水師征勦事宜理當獨任但二臣詞意懇切非臣所能禁止且未奉有督撫同進之旨相應奏聞得旨總督姚啟聖統轄福建全省兵馬同提督施琅進取澎湖臺灣巡撫吳興祚有刑名錢糧諸務不必進勦○是月免福建泰甯縣去年水災江南泰州清河等二十三州縣衛水災額賦有差

十一月庚戌朔轉杜臻爲刑部左侍郎以葉方藹爲刑部右侍郎

由翰林院掌院學士遷

○辛亥諭大學士等近日言官參奏原任太僕寺卿

王繼貞原任總兵官郭義朕念從賊者前既有旨寬宥今又加誅戮於前旨未符若大惡如馬寶夏國相胡國柱王永清等朕決不恕其餘若盡論誅則金光祖等諸人亦皆誅之不太甚乎其失節

從賊者令革職放回原籍以示寬典○丙辰諭吏部兵部總督哈
占蔡毓榮率兵勦賊直抵雲貴勞績懋著可復其原官○辛酉諭
大學士明珠朕頃駐固安任邱聞戶部官員將各州縣均派草豆
其爲擾民工部向民間私借柴炭亦多擾累又聞部院各官藉稱
豫備差遣傳集窮民跟隨苦累俱宜嚴禁每次巡幸騷擾百姓者
多係部院各官可傳諭嚴飭以後毋得再蹈前轍○癸亥定遠平
寇大將軍貝子章泰征南大將軍都統賴塔等奏十月初八日臣
等統率滿漢官兵進薄雲南省城下併力環攻賊勢惶迫無措二
十八日夜僞將軍線絨吳國柱吳世吉黃明原任都統何進忠原
任巡撫林天擎等謀擒逆首吳世璠郭壯圖以獻吳世璠聞變自
殺郭壯圖及其子郭宗汾皆自刎死二十九日線絨率眾出城降
遂擒首謀獻計之僞大學士方光琛及其子方學潛姪方學範至

軍前磔之戮吳世璠屍傳首京師僞官弁一千五百八十餘員兵五千一百三十餘名俱投誠雲南平得旨覽貝子等奏統領滿漢官兵遵奉成命恢復雲南省城疆宇蕩平具見籌畫周詳調度有方勦撫並用克奏膚功朕心深爲嘉悅著從優議敘具奏又奏僞將軍夏國相等敗遁廣南臣檄令土官儂朋及防守臨安總兵官李國樑率師追勦直抵西板橋環圍之塞其去路夏國相與僞將軍王永清黃福李攀龍楊松魁率僞屬官兵至軍前各繳僞印劄降臣等公議斬李攀龍等於軍前夏國相爲吳三桂壻乃賊渠著名者宜送京師正法又都統希福追勦逆賊胡國柱等至雲龍州之青里屋胡國柱度不能脫遂自縊僞帥王敘李匡皆自焚死僞將軍王公良等率餘眾來降下部議敘○上詣太皇太后皇太后宮奏捷羣臣朝賀於乾清門○是日以賊平昭告孝陵

軍駕次薊州○琉球國中山王世子尙貞遣陪臣毛見龍等表貢
方物奏言臣父尙質於康熙七年十一月十七日卒謹遵舊典請
封○甲子 上謁 孝陵○丁卯行告祭禮○辛未命章泰趙良
棟來京陛見○乙亥 上聞居民有爲虎傷者是日圍獵南山
上親殮二大虎並一小虎民絕虎患○丙子予故原任理藩院左
侍郎達哈塔塔祭葬○己卯 上回鑾○是月免直隸霸州湖廣江
陵監利被災額賦

十二月壬午 上還京師○甲申予雲南安邱縣知縣胡端官廕

○戊子諭大學士等賞罰乃國家之大柄忠逆實臣節之大防從
古帝王敷治戡亂未有忠不賞而逆不罰者但其中情有輕重故
法有寬嚴必功罪分明予奪精確始稱允協前總兵官王永清身
膺重任甘心從賊及大兵抵滇圍困省城爲日甚久猶不歸順乃

與夏國相隨在奔竄追計無復之始來投誠故擊禁其子封其家產今文武官員見在雲南仍不投順者可察出如王永清之例一併封拏其應作何結案曾經議政王等議俟雲南省城克復之後再議今議此案時應將從賊受職歸順後未經定議官員品秩稍大者通行察出具奏其從賊官員前已歸順曾經奉旨從寬免罪者不必概行察議此內有原爲大吏覲顏從逆又受僞職者名節棄滅大玷人臣之誼若輩不合仍令居官應俱革任著議奏儻其間有效力真確功績甚著之人應酌量留任仍於各名下明白開著勞績見在候缺者俱停其錄用至明歲以後文武各官舉行大計軍政凡屬從賊受職歸順者俟督撫提鎮開造計冊到日吏兵二部應行察示罷黜著議政王貝勒大臣會議具奏○設滿洲將軍駐荊州漢軍將軍駐漢中○敘恢復海澄廈門金門十九寨功

授福建提督楊捷三等阿達哈哈番○辛卯工部侍郎祁通額以病乞休從之○戶部議覆貴州巡撫楊雍建奏貴陽等七府漢土司錢糧若歸併附近知縣管理恐呼應不靈請仍令該土司管理責令知府督催從之○癸巳召議政王大臣大學士學士九卿詹事科道等官至乾清門命大學士勒德洪等傳諭曰頃九卿等以大懃既除寰宇底定奏請上朕尊號朕思曩者平南王尚可喜奏請回籍時朕與閣臣面議圖海言斷不可遷移朕以三藩俱握兵柄恐日久滋變馴致不測故決意撤回不圖吳三桂背恩反叛天下騷動僞檄一傳四方響應八年之間兵民交困賴上天眷佑祖宗福庇逆賊蕩平儻復再延數年百姓不幾疲敝耶憶爾時惟有莫洛米斯翰明珠蘇拜塞克德等言應遷移其餘並未言遷移吳三桂必致反叛也議事之人至今尙多試問當日曾有言吳

三桂必反者否及吳逆倡叛四方擾亂多有退而非毀謂因遷移所致若彼時朕諉過於人將會議言應撤者盡行誅戮則彼等含冤泉壤矣朕素不肯諉過臣下卽令部院事有錯誤朕亦自任朕自少時以三藩勢焰日熾不可不撤豈因吳三桂反叛遂諉過於人耶今亂賊雖已削平而瘡痍尙未全復君臣宜益加修省恤兵養民布宣德化務以廉潔爲本共致太平若遂以爲功德崇上尊稱濫邀恩賞實可恥也裕親王福全奏曰吳逆反叛以來臣忝列議政常見一切調度將士翦除逆寇非臣等意見所能及皆奉上諭遵行所致實 皇上功德理應崇上尊號康親王傑書安親王岳樂奏曰臣等前在行間凡恢復城池勦禦賊寇盡出自 皇上妙算籌畫精詳臣等慄奉敕諭遵行而已非臣等意慮設施克收成效理應加上鴻稱以顯功德 上復召大學士勒德洪尙書

伊桑阿左都御史徐元文侍郎李天馥學士噶爾圖等論曰頃九卿等以逆首既除四方底定奏請上朕尊號朕自御極以來日夜孜孜以安生民爲念乃逆賊吳三桂一倡變亂遂致塗炭八年當吳三桂初叛時散布僞劄煽惑人心各省兵民相率背叛此皆德澤素未孚洽吏治不能剔釐所致幸賴上天眷佑祖宗威靈滿洲兵士之力逆渠授首奸黨悉除地方平靖獨念數年之中水旱頻仍災異疊見師旅疲於征調被創者未起閭閻敝於轉運困苦者未甦且因軍興不給裁減官員俸祿及各項錢糧並增加各項銀兩仍未復舊每一軫念甚歉於懷若大小臣工人人廉潔俾生民得所風俗醇厚教化振興天下共享太平之福雖不上尊號令名實多如一切政治不能修舉則上尊號何益朕斷不受此虛名也朕自幼讀書覽古人君行事始終一轍者甚少嘗以爲戒惟

恐幾務或曠鮮克有終以故宵衣旰食祁寒盛暑不敢少間偶有
違和亦勉出聽斷或中夜有機宜奏報未嘗不披衣而起朕非不
知燕息自怡蓋所愛不在一身總爲天下生靈之計政事務求當
理官職務在得人期於家給人足百姓樂業而已今吏鮮潔清之
效民無康阜之休君臣之間全無功績可紀儻復上朕尊號加爾
等官秩則徒有負愧何尊榮之有至於 太皇太后 皇太后加
上徽號詔赦天下理所宜然其上朕尊號之事斷不可行乃朕實
意非粉飾之詞也自今已往大小臣工宜各洗心滌慮砥節勵行
休養蒼黎培復元氣爾等可向九卿各官悉諭朕意不必再行陳
請○裁陝西甘肅靖邊衛同知○予廣東殉難都司白虎官廕○
乙未調帥顏保爲禮部尙書由工部調○丁酉 上以滇逆蕩平遣官
祭告 天地 太廟 社稷○以薩穆哈爲工部尙書由左都御史遷○

轉黨務禮爲工部左侍郎以蘇拜爲工部右侍郎

由左副都御史遷

○戊

戌遣大學士勒德洪明珠詣 慈甯宮奏請加上徽號凡三奏乃

允行○太子太傅都統大學士圖海卒命大臣侍衛奠茶酒賜銀

三千兩及蟒段鞍馬○己亥 上御太和殿羣臣行慶賀禮頒詔

天下○冊封貴妃佟氏爲 皇貴妃鈕祜祿氏爲 貴妃惠嬪納

喇氏爲 惠妃宜嬪郭羅洛氏爲 宜妃德嬪吳雅氏爲 德妃

榮嬪馬佳氏爲 榮妃○辛丑調李士楨爲廣東巡撫以佟康年

爲江西巡撫

由福建布政使遷

○壬寅裁直隸各省添設驛站並加增協

濟夫馬○癸卯加上 太皇太后徽號曰 昭聖慈壽恭簡安懿

章慶敦惠溫莊康和仁宣弘靖太皇太后 皇太后曰 仁憲恪

順誠惠純淑端禧皇太后御門受賀頒詔天下賚宗室以及外藩

子內外官封贈廣解額舉隱逸旌節孝恤孤獨罪非常赦所不原

者咸赦除之○以吳興祚爲廣東廣西總督

由福建巡撫遷

于成龍爲江

南江西總督

由直隸巡撫遷

余國柱爲江甯巡撫

由左副都御史遷

○是月免江

南六合直隸文安及江西新建等十四州縣衛所浙江黃巖等十

二縣衛被災額賦有差○是歲朝鮮琉球來貢○人丁戶口一千

七百二十三萬五千三百六十八田地山蕩畦地五百三十一萬

五千三百七十二頃六十畝徵銀二千二百一十八萬三千七百

六十兩有奇米豆麥六百二十七萬一千一百八石四斗有奇草

二百四十五萬五千七百五十束茶十五萬五千三百六十五引

行鹽三百九十八萬三千七十二引徵課銀二百三十九萬九千

四百六十八兩有奇鑄錢二萬三千一百三十九萬八千六百有

奇

東華錄

康熙二十九

臣王先謙敬編

臣周爾蕃恭校

康熙二十一年壬戌春正月壬戌以上元節賜外藩王貝勒貝子
公台吉及內大臣大學士上三旗都統副都統尙書侍郎學士侍
衛等宴 上御乾清宮宴大學士部院卿寺翰詹科道諸臣九十
三員 上命學士張英侍講高士奇傳諭曰向來內殿筵宴諸臣
未與今因海內乂安時當令序特於乾清宮賜宴君臣一體共樂
昇平同昭上下泰交之盛諸臣當懼忤暢飲以副朕懷大學士李
蔚奏曰 皇上特恩曠典千載一遇臣等不勝感激奏畢分左右
班以次序進樂合各就位叩頭坐 上進膳諸臣乃飯 上命各
飽飫盡量少選徹饌更設肴核酒觴旣陳大學士勒德洪至 御

前跪進酒上壽畢 上命大學士尙書都御史侍郎學士以次至
御座前親賜飲以下諸臣俱命至 御前賜飲又命學士張玉
書張英傳諭曰今日內殿嘉宴特敕諸臣笑語無禁諸臣奉詔暢
飲極歡樂奏二闋 上復命張玉書張英傳諭曰宴畢時諸臣可
近 御座前觀鐙朕更賜以卮酒於是大學士尙書都御史以次
至 御座旁觀鰲山鐙又命侍郎以下諸臣俱至 御前賜飲特
命光祿寺卿馬世濟右通政陳汝器至 御座前親賜飲以馬世
濟爲殉難巡撫馬雄鎮之子陳汝器爲殉難副使陳啟泰之子也
既撤筵諸臣以次出 上命羣臣有霑醉者令內官扶掖而行
上召張玉書陳廷敬張英諭曰每見漢唐以來君臣同樂有廣和
之詩今朕雖不敢效古先聖王亦欲紀一時之盛可做柏梁體賦
詩進覽陳廷敬奏言臣等草野賤士得覩 天家景物蒙 聖恩

深厚眞明良喜起之休且百工熙庶事康皆君臣交儆之辭自是唐虞盛事臣等身際休明受恩愈深但愧報稱愈難於是陳廷敬等出宣旨羣臣奏曰臣等敢不歌詠太平但恐不能廣颺 聖德大學士李蔚言柏梁體詩首一句當恭請 皇上御製陳廷敬復入奏 上曰明日早發○遣中使至大學士杜立德第賜酒饌諭曰卿弼亮老臣久任機密端醇恪恭勤慎素著茲海宇蕩平時當令序內殿賜宴廷臣念卿臥病不克同此歡譙特遣中使慰問賜以醴饌卿其加餐珍攝以副朕惓惓至意○癸亥翰林院掌院學士陳廷敬內閣學士張玉書至乾清門候旨侍衛捧 御製詩序出 御製首句云麗日和風被萬方羣臣集太和殿下以次各賦詩九十三韻序云朕於宣政聽覽之餘講貫經義歷觀史冊於書見元首股肱廣颺喜起之盛於詩見鹿鳴天保諸篇未嘗不慕古

之君臣一德一心相悅若斯之隆也今際海內宴安兵革偃息首春令序九陌鎧輝豐穰有徵吾民咸樂思與諸臣欣時式燕爰於乾清宮廣集簪裾肆筵投几斯時也蟾光燦炬焜燿堂廉綵樹瓊葩雜羅樽俎許笑言之勿禁寬儀法而不糾復令次登文陛渥以金疊咸俾有三爵油油之色焉易曰上下交而志同傳曰享以訓恭儉宴以示慈惠則今日之兕觥旨酒豈徒以飲食宴樂云爾哉願瞻諸臣或位居諧弼或職任卿尹或典文翰或司獻納宜共成篇什以紹雅頌之音朕發端首倡倣柏梁體班聯遞賡用昭昇平盛事冀垂不朽云○丙寅調蔡毓榮爲雲南貴州總督由湖廣調○丁卯議政王大臣會議逆賊吳三桂骸骨分發各省吳世璠首級交與刑部懸挂示眾逆黨夏國相應凌遲處死及勢迫投降巴養元等五人應立斬梟示 上曰此中尙有可議者否大學士勒德洪

明珠奏曰此輩罪犯已極應正國法似無可議又逆賊耿精忠等十人應凌遲處死其逆黨黃國瑞等十九人應立斬上曰耿精忠身造罪孽應當極刑其子等俱行凌遲亦有可憫可改爲斬否明珠奏曰耿精忠之罪較尙之信尤爲重大尙之信不過縱酒行兇口出妄言耿精忠負恩謀反且與安親王書內多有狂悖之語甚爲可惡上又曰賊黨官員內尙有可矜者否明珠奏曰此內有陳夢雷金鏡田起蛟李學詩四人犯罪固應處死然尙有可宥之處上曰耿精忠等事關重大著議政王大臣九卿詹事科道會同詳議其吳三桂骸骨分發各省及吳世璠首級懸示夏國相凌遲巴養元等梟示等事亦示九卿等知之明珠奏曰春正雖不用刑但此輩罪惡重大與尋常不同應於兩三日完結○戊辰議政王大臣會議逆賊耿精忠等分別凌遲處斬具題得旨耿精忠

革去王爵著卽凌遲處死其子耿顯祚革去散秩大臣著卽處斬
徐文耀王世瑜白顯中江元勳曾養性王振邦蔣得軫劉進忠俱
卽凌遲處死黃國瑞林芳孫廖廷雲李似桂夏季旺呂應斗武灝
司定猷沈偉郭景汾羅萬里祖宏勳陳儀陳斌呂八俱著卽處斬
耿精忠劉進忠首級著梟示田起蛟金鏡李學詩陳夢雷俱從寬
免死內係旗人給與伊本主爲奴係民入官給披甲新滿洲爲奴
餘如議○以塞克德爲左副都御史由御史遷○己巳諭理藩院尙書
阿穆瑚瑯等近見內外蒙古接壤地方互相攘奪盜竊者甚多遇
此等事遣爾衙門官員前往察閱不思調和兩國裨益地方據實
奏聞以副朕驅使但苟且竣局希圖脫免凡事有問諉云不知此
等事情皆朕親行諮訪得之爾等堂司官何曾啟奏一事爾衙門
司官筆帖式並無一人克盡職掌著將此諭傳知以後務期勤慎

效力不得仍前草率疏忽○封安親王岳樂子岳希爲僖郡王○調董衛國爲湖廣總督裁江西總督歸併江南○礫從逆貴州提督李本深於市伊孫李象乾李象坤及民籍親弟之子李濟祥李濟民並立斬○辛未諭戶部漕糧定例官收官兌獨浙江民兌另立私截之名困苦百姓著檄巡撫嚴禁違者卽行參劾○壬申鐫

御製昇平嘉宴詩序及詩於石貯翰林院敬一亭○乙亥以格

爾古德爲直隸巡撫

由內閣學士遷

○復直隸軍政○丙子以馬世濟爲

左副都御史

由光祿寺卿遷

二月庚辰以達都爲左都御史

由吏部左侍郎遷

○議政王大臣等議都

統根特不請旨擅拘禁提督佟徽年又不進重慶輒以山大路險題請又令進剿譚宏彭時亨復推諉規避應削職得旨根特才具頗優人亦勇健情罪不甚重大卽行削職似屬可惜著降級從寬

留任○辛巳裁鄖陽提督設副將一中軍都司一左右二營守備

二留兵一千六百名○壬午以達岱爲內閣學士由詹事選○以馬斯

良爲福建布政使由偏沅按察使遷○子故太子太傅都統三等公議政

大臣中和殿大學士兼吏部尙書圖海祭葬加祭二次諡文襄○

先是左副都御史余國柱請釐正郊廟燕享樂章 上曰饗祀樂

章一代制作所繫禮部翰林院集議以聞至是部臣等議自古廟

樂原以頌述祖宗功德本朝郊祀 天地各 壇廟樂章曲名曰

平見今遵用已久况 太祖 太宗 世祖同在 太廟致祭不

便分廟另撰宜如舊惟朝會燕饗等樂會典所載曲調風雅未備

宜敕下所司酌古準今求聲律之原定雅奏之節進呈請定嘉名

以昭盛典從之○癸未以滇省蕩平遣官祭嶽鎮海瀆歷代帝王

陵寢先師闕里○宗人府題閒散宗室勒爾錦贈朱方旦至人里

聖人堂扁額原任湖廣巡撫張朝珍贈聖教帝師扁額應行文巡撫王新命查其果有憑據否或係朱方旦自行標榜俟問明具題到日再議 上諭大學士等此事毋庸行查前勒爾錦領兵在荆

州時朕已聞此等事會諭彼時差去之人朕知朱方旦係狂妄小人軍機大事萬不可聽其蠱惑又對秦遣往軍前回時路經武昌原任巡撫張朝珍向對秦云朱方旦果一奇異神人爾宜相會遂接見以賓禮優待由此觀之勒爾錦等所贈扁額是真著卽議結尋議勒爾錦見在羈禁張朝珍已經病故俱無庸議得旨張朝珍所贖世襲官革去○甲申 上御經筵○裁江西饒州總兵官設參將一○乙酉轉覺羅沙賴爲吏部左侍郎調科爾坤爲吏部左侍郎由戶部調○丙戌調董國興爲福建巡撫以王日藻爲河南巡撫由江西布政使遷○丁亥以王定國爲安徽按察使由浙江嘉湖道遷○己丑予

四川殉難知州徐盛通判薛人鳳知縣廖士貞王質典史劉廷臣
卹贈有差○辛卯 上爲 太皇太后祝釐居景山齋戒祭星遣
近御侍衛關保偕慈甯宮首領太監牛之奇乾清宮首領太監顧
文興祭星三年○議政王大臣會議原任布政使成額筆帖式巴
席書舒從賊應立斬得旨伊等情罪法難寬宥且巴席係滿洲人
與巴三綱聯爲兄弟情罪甚爲可惡依議立斬成額書舒改立絞
○敘恢復海澄廈門金門功給福建總督姚啟聖拜他喇布勒哈
番又一拖沙喇哈番○壬辰論學士張英爾素性醇樸侍從有年
朝夕講筵恪共盡職茲因爾父未葬具奏請假朕念人子至情忠
孝皆出一理准假南旋特賜白金五百兩表裏二十疋旣旌爾勤
勞兼資墓田之用爾其欽悉朕惓惓至意○直隸巡撫格爾古德
陛辭 上諭凡爲官者承貪吏之後名譽甚易承廉吏之後名譽

甚難金世德子成龍居官有聲爾繼其後得名必遲爾毋欲速以
求名遠則恐致貽害直隸旗下莊頭與民雜處朕聞所在兇惡莊
頭自以旗下倚恃其主甚爲民害爾到任後加意嚴查務期懲創
卽皇莊亦毋寬宥○轉額庫禮爲戶部左侍郎調宜昌阿爲戶部
右侍郎由刑部調○癸巳 上以雲南蕩平祭告 永陵 福陵 昭

陵 皇太子允礽從是日啟鑾○裁山東提督○外藩王貝勒貝
子公台吉等請上 尊號不許○九卿詹事科道等議覆翰林院
侍講王鴻緒奏參楚人朱方旦詭立邪說妄言休咎煽惑愚民誣
罔悖逆經湖廣巡撫王新命審實具題朱方旦應立斬願齊宏陸
光旭翟鳳彩甘稱弟子造刻邪書傳播中外俱應斬監候從之○
乙未 上謁 孝陵○戊戌 上遣領侍衛內大臣舅舅佟國維
大學士明珠往伯夷叔齊廟行禮諭伯夷叔齊古之聖人清風可

仰爾等前往可焚香展敬○庚子偏沅巡撫韓世琦奏料理廣西軍務督捕右理事官麻勒吉移稱逆賊黃明已被苗人殺死應撤兵回楚下部知之○辛丑 上出山海關○是月免廣西柳州貴州慶遠康熙十八年逋賦及江南海州沐陽等三州縣去年被水額賦

三月己酉朔以張所志爲江西布政使

由福建按察使遷

范時秀爲湖南

按察使

由雲南永昌道遷

○庚戌

上漁於遼河賜從官魚○壬子

上

謁 福陵又謁

昭陵是日駐蹕盛京○甲寅

上詣 福陵行

大祭禮○丙辰

上詣

昭陵行大祭禮○

上途間屢次奏請

太皇太后

皇太后聖安至是附奏

太皇太后書曰臣自山

海關至盛京水土皆佳獸多魚鮮每當食頃輒念不能馳奉 太皇太后聖祖母甚歎於懷到盛京後身親網獲鱧魚鱮魚設法成

段浸以羊脂者一種鹽醃者一種星馳遞送心期奉到之日儻得
味仍鮮美庶可稍見微誠山中野燒自落榛實及山核桃朝鮮所
進柿餅松子白菓栗子附候 安奏啟同往伏乞 俯賜一笑不
勝欣幸○諭戶部刑部朕承 祖宗丕緒撫御區宇日以子育元
元爲念自逆賊吳三桂倡亂滇南多方煽動軍興入載中外驛騷
仰賴 祖宗在天之靈默垂眷佑殄滅兇渠民生乂安疆宇底定
特行徧祀 山陵之禮用告成功茲恭詣 福陵 昭陵謁祭禮
竣惟盛京爲國家肇基重地朕躬親幸宜沛大澤以示殊恩山海
關以外及甯古塔等處地方官吏軍民人等除十惡死罪不赦外
其餘已結未結一切死罪俱著減等發落軍流徒杖等犯悉准赦
免奉天錦州二府屬康熙二十一年地丁正項錢糧著通行蠲豁
其官役墊補包賠等項應追銀兩察果家產盡絕亦並豁免用稱

朕加惠根本優恤黎民至意○齊守陵官及盛京諸臣年老致

仕甲士傷廢退閒者咸賜予有差○己未上謁永陵行大祭

禮○庚申上幸烏喇行圍○辛酉望祀長白山○予故兵部侍

郎項景襄祭葬○乙亥御舟泛松花江至大烏喇

夏四月辛巳上回鑾○壬午調杜臻爲吏部左侍郎由刑部調○癸

未賜烏喇將軍副都統等宴並衣幣鞍轡資烏喇致仕官以下○

丁亥以趙進美爲福建按察使由河南河北道遷○兵部題僞將軍王公

夏王仲禮僞巡撫吳謙僞侍郎劉國祥僞太僕寺卿蕭應秀僞員

外郎劉之延等值逆賊吳三桂變亂卽助惡反叛擾害地方應行

文將軍馬緝總督蔡毓榮巡撫王繼文卽行處斬至原任鎮遠副

將從逆爲僞將軍鎮遠伯江義不思皇上擢用封疆之任以圖

報效乃背恩反叛助吳三桂行惡情罪甚重及大兵恢復雲南仍

隨逆賊胡國柱逃匿勢窮始來歸誠應行文將軍馬緝等卽凌遲處死並王公良等首級懸示伊等十六歲以上子亦俱在彼處處斬家產籍沒其妻並未及年歲之子查交內務府其餘微員該督撫等分發山東河南湖廣江西省安插投誠僞總兵以下人等應歸入凱旋官兵六起內赴京從之○兵部題原任經略中軍總兵官吳石珊係留軍前效力贖罪之人今雲貴恢復應令吳石珊同六兵來京到日再議得旨吳石珊係包衣佐領下舊人順從王輔臣深爲可惡著拏送來京○兵部題逆賊胡國柱王緒李匡等各處抗拒大兵及恢復雲南潛身逃竄屢次招撫不卽投誠被大兵迅追緝拏情急始行自縊蹈火而死情罪重大伊等子弟法難寬宥應行文將軍總督等悉行處斬妻女家口財物籍沒交送內務府從之○兵部議覆廣西巡撫郝浴奏安南都統使莫元清同弟

莫敬光爲安南鄭祚攻偪投奔內地並無從逆助惡擾害地方之
迹但先經原任將軍莽依圖奏稱莫元清棄高平敗奔富州又安
南國王黎維正奏稱吳三桂變起莫元清同惡相濟爲賊辦糧莫
元清蒙 皇上鴻恩封爲都統使駐防高平不圖報恩吳三桂反
叛卽從賊助惡理應從重治罪但已身故應免議處革去都統使
之職莫敬光旣經帶領家眷繳印投誠免其應擬之罪係外國之
人不便居於內地應行該督撫將莫敬光及伊帶來家眷一併發
回安南移咨國王將莫敬光等毋致殘害務令安插得所從之○
辛卯命翰林院檢討汪楫爲正使內閣中書舍人林麟焄爲副使
往封琉球國世子尙貞爲琉球國中山王○甲午先是福建提督
施琅奏賊鯨久泊澎湖悉力固守當此冬春之際颶風時發我舟
驟難過洋臣見在練習水師又遭閒謀通臣舊時部曲使爲內應

請俟明年三四月間進兵可獲全勝 上允之至是施琅奏夏至南風盛發不可進兵請至十月大舉 上命議政王大臣集議僉

謂師期不便屢遷應檄總督姚啟聖提督施琅刻期於夏至後進取臺灣得旨進剿海寇關繫重大總督姚啟聖提督施琅身在地方將海面形勢賊中情狀審察確實如有可破可剿之機著協謀合慮酌行勦撫毋失機會○丁酉諭大學士明珠朕巡行沿邊地方見設立界限處墳墓毀損枯骨暴露者甚多著盛京將軍安珠護徧察瘞埋○戊戌兵部題懷忠將軍海潮龍咨稱吳逆叛時偽總兵劉芝林將伊舉家擒拏俱行分散貨財鈔洗應行文鎮安將軍馬緝並雲貴督撫將所鈔海潮龍見貯家財及家口查還其入在來京六起之內者亦查明發還從之○己亥 駕過海城縣遣內大臣公坡爾益往平南親王尚可喜墓奠酒○乙巳尙陽堡流

犯王廷試子德麟叩闕稱伊父以窩逃充發今年老懇發回原籍願以身代督捕議不准行 上曰王德麟控稱伊父年老願以身代罪情實可憫且遇朕來此得以陳情叩闕此亦伊難得之遇其父子又俱係讀書人著一併發回原籍後不爲例○丁未 車駕入山海關○是月免湖北沔陽潛江等縣衛去年水災賦十之三五月戊申朔予廣西閩門殉難平南縣知縣周岱生官廕○辛亥 上還京師○壬子諭大學士等流徙甯古塔烏喇人犯朕向者未悉其苦今謁 陵至彼目擊方知此輩既無房屋棲身又無資力耕種復重困於差徭况南人脆弱來此苦寒之地風雪凜冽必至顛踣溝壑遠離鄉土音信不通殊可憫惻雖若輩罪由自作然發遼陽諸處安置亦足以蔽其辜矣彼地尙有田土可以資生室廬可以安處且此等罪人雖在烏喇等處亦無用也○廣西巡撫

郝浴奏撫標官兵不應裁去九卿會議山東江甯河南山西直隸兵丁俱應留一千名其餘各省俱留一千五百名得旨巡撫舊制營兵至輔政諸臣時始行停止朕思裁兵一事關繫最爲緊要必措置得宜地方始得安甯每見武弁額兵有名無實虛冒錢糧又徇情將年老有疾者存留強壯者反行裁去則老弱徒然充伍虛糜兵餉強壯棄置不用豈能安靜若將此情弊清除則兵丁自俱心服而地方亦保甯謐矣可將此本文議政王大臣九卿詹事科

道會議具奏○癸丑以李世昌爲湖廣按察使

由廣西蒼梧道遷

○甲寅

御書清慎勤三大字頒發各省督撫○乙卯遣尙書伊桑阿副

都御史宋文運給事中王曰溫御史伊喇喀勘江南河工○贈死

節雲南巡撫朱國治戶部右侍郎子祭葬廕一子入監讀書○丙

辰鴻臚寺卿陳壽奏臣原任陝西提督陳福殞命行營妻子淪

陷川中蒙恩授世襲三等精奇尼哈番暫令臣子世怡承襲今臣兄之子世琳等已尋獲應仍還陳世琳襲替允之○丁巳以庫勒納爲刑部右侍郎由翰林院掌院學士遷○戊午遣侍郎庫勒納等奠故刑

部右侍郎葉方藹賜白金二百兩○以宋文運爲刑部左侍郎由副都御史遷

○議政王大臣等議逆賊彭時亨譚天祕投誠復叛抗拒

大兵情急歸降罪惡重大應交刑部卽凌遲正法梟示從之○己

未保和殿大學士杜立德以病乞回籍調理得旨卿輔弼重臣端

醇恪慎簡任機務效力有年勤勞素著倚任方殷覽奏年邁患病

情詞懇切准解任調理乘驛回籍著差官護送以示眷懷○乙丑

候補布政使崔維雅奏呈所輯河防芻議兩河治略二書 上曰

治河之道順水性以治之易於成功古之治黃河者惟在去其害

而止今則不特去其害並欲資其力以輓漕糧較古更難崔維

雅所奏著差往勘閱河工大臣將伊帶往會同總河靳輔確議具奏書並發○丙寅諭甯古塔將軍巴海副都統薩布素瓦禮祜等朕幸吉林地方訪詢民隱見兵丁役重差繁勞苦至極此等情由回鑾之日將軍以下至於兵丁教諭大意已有特旨朕自至京師復爲思繹不將各種無益差徭顯與革除兵丁人等終無裨補且不得霑實惠矣一鷹鷂窩雛於三月尋覓四月內捕取最妨農事兼屬無益况所得鷹鷂不諳呼飼難至京師徒勞人力應行停止一自八月放鷹原欲令之熟習以便齋送數年以來並無名鷹貢至京師在烏喇地方兵丁於冬寒之時尋覓山雞人馬勞頓應行停止一圍獵以講武事必不可廢亦不可無時冬月行大圍臘底行年圍春夏則看馬之肥瘠酌量行圍令貧人採取禽獸皮肉須豫先傳明日期以便遵行所獲禽獸均行分給圍獵不整肅者照

例懲治不可時加責罰苛求瑣屑遇有猛獸須小心防禦以人爲重勿致誤有所傷一打鱗鯉等魚既有專管西特庫等烏喇兵丁應停差役其搬移新滿洲採取造房並船隻桅木等項及偵探巡邏等差俱係軍務乃駐防官兵專責不可寬假應照常行此外偶爾差遣大臣侍衛督看採取東珠砍伐木植尋覓鷹鷂不涉每歲定例所行之事似無過勞此後將軍以下撥什庫以上應念兵丁遠居邊境無市貿易身冒嚴寒往採山木妻子汲水操作備極艱辛時加憐憫吉林烏喇田地米糧甚爲緊要農事有誤關繫非細宜勤勉之使勤耕種朕軫念滿洲人民生理欲遣人專往以驛遞疲弊故因筆帖式來奏特諭○福建將軍馬九玉奏請罷職得旨馬九玉於耿精忠叛時會哭勸再三及歸正後又甚效力非他人可比著以原官解任來京○丁卯以牛紐爲翰林院掌院學士詹

事○戊辰以王熙爲保和殿大學士原任兵部尚書○庚午上御乾清

宮講官牛紐等進講朕卦象象畢上曰講義云一國非之而不

顧天下非之而不顧此必認得道理真乃爲無弊否則反爲乖戾

矣牛紐等奏曰誠如聖諭○以熊一瀟爲刑部右侍郎由順天府尹

遷○內閣學士李光地以送母回籍乞假允之○辛未左副都御

史馬世濟條陳吳三桂尙之信耿精忠屬下爲外官者咸宜罷黜

回京上諭大學士等前大兵進勦時有本身陷在賊中其子弟

仕宦各省亦有備辦草料轉輸糧餉者今事平輒行追論奪其官

爵撤回殊覺煩擾况漢官如曹申吉羅森等亦有子弟親戚若皆

不許仕宦應鄉會試可乎照此旨傳諭將原本給還○壬申以李

輝祖爲湖廣布政使由貴州按察使遷○甲戌吏部題編修杜訥呈請復

勵姓允之○三法司議僞大學士方廣琛之弟方廣揚反叛情實

應立斬從之○乙亥安塘筆帖式報稱大兵進取臺灣以風大不得前總督姚啟聖尙駐銅山提督施琅移泊雲霄聞海賊劉國軒等扼守澎湖諸隘矚我兵前進卽鈔襲其後於是議政王大臣等會議請檄總督姚啟聖提督施琅若目前風大未便進剿卽統官兵回汛整飭舟師相機再舉從之○丙子諭大學士等朕觀部院衙門大小官員俱分班啟奏甚或一部分作數班朕與爾等皆每日曉起部院官員分數班啟奏殊非上下一體勵精圖治之意嗣後滿漢大小官員除有事故外凡有啟奏事宜俱著一同啟奏都察院衙門及科道官員無逐日啟奏本章著每日黎明齊集午門如滿漢部院官員有怠惰規避者卽行察參又大小各衙門滿漢官員雖該衙門無啟奏事宜亦著每日同啟奏官員黎明齊集午門俟啟奏事畢同散有怠惰規避不於黎明齊集者亦著都察院

及科道官員察出參奏

六月丁丑朔議政王大臣等奏已薨簡親王喇布於螺子山對敵
退回一案前議將隨從王護衛散騎郎及在陣失肅長史護衛等
拏禁俟同事大兵到日再行議罪後議將護衛散騎郎等停其拏
禁餘俱照前議 上曰簡親王敗回是實軍法應嚴此前議甚當
後議顯係徇情殊爲不合著嚴飭○己卯諭部院諸臣朕因天氣
炎熱移駐瀛臺今幸天下少安四方無事然每日侵晨御門聽政
未嘗暫輟卿等各勤職掌時來啟奏會記宋史所載賜諸臣於後
苑賞花釣魚傳爲美談今於橋畔懸設罾網以待卿等遊釣可於
奏事之暇各就水次舉網得魚隨其大小多寡攜歸抵舍以見朕
一體燕適之意誰謂東方曼倩割肉之事不可見於今日也特諭

○以王國安爲內閣學士

由內閣侍讀學士遷

吳瑛爲左副都御史

由太僕寺卿遷

○予故原任吏部侍郎楊永甯祭葬○乙酉以胡簡敬爲內閣學

士

由翰林院侍讀學士遷

○丁亥諭刑部尙書魏象樞等今天氣炎熱可將

爾部事件次第速行審結勿得遲延使犯人於應得罪外更受餘

辜○己丑諭大學士等日來天時亢暘猶望雨澤之降今觀亢旱

已甚天行之愆人事之失也如有應行革去事宜令九卿詹事科

道官員會議於是九卿諸臣會議請清理刑獄並敕刑部督捕直

隸各省督撫於應結事件速行結案又漢科道官員請暫釋江西

吉安出征官拘禁者俟同事大兵還日議罪大學士等轉奏上

曰清理刑獄等事可如所奏其所議省釋拘禁人員亦寬政之一

端也見在拘繫者俱令暫釋俟大兵還日再行議罪○壬辰以李

國亮爲貴州按察使

由陝西糧道遷

○癸巳贈湖南殉難四品官董重民

官○乙未命順承郡王勒爾貝弟楊起襲順承郡王○吏部議覆

給事中李迥奏河南等六省學道督撫皆以公明尤著保舉此等
希圖內升不無奔競之弊請敕部確議定額嗣後各省學道令督
撫於三年報滿日以公明尤著者保題吏部開列 欽定一員以
京堂用其餘升一級以道員先用未經保題者仍照見行例行從
之○丙申給事中孫蕙題參原任廣東提督今升鑾儀使嚴自明
任廣東提督時甘心從逆反正之後 皇上寬恩待以不死且授
以將軍升爲鑾儀使自應聞命馳赴乃嚴自明遲至二年後始行
到任莅任未幾又奏請往雲南找尋眷口行至揚州託疾逗遛日
肆聲歌且縱其子嚴愈在泰州地方肆虐殃民請斥革究擬下部
議尋兵部議嚴自明應革職並革三等阿達哈哈番妻子家產交
內務府伊子知州嚴愈交吏部議得旨嚴自明著革去鑾儀使三
等阿達哈哈番從寬免交內務府著入旗餘如議○甲辰文華殿

大學士馮溥以老乞休得旨卿輔弼重臣端敏練達簡任機務效力有年勤勞素著倚毘方殷覽奏以年邁請休情詞懇切准以原官致仕乘驛回籍著差官護送以示眷懷○以王國安爲浙江巡撫

由內閣
學士選

○乙巳命奮威將軍王進寶來京陛見

臣王先謙敬編

臣周綸蕃恭校

秋七月己酉諭吏部圖治首在安民勸善莫先懲惡必咨詢廉訪
責有專官而後民隱得以上聞奸頑爲之斂戢近聞直隸各
方多有紳衿勢要土棍豪強及旗下兇惡人員並莊頭等縱暴恣
行武斷鄉曲有司畏威而不敢問大吏徇隱而不能糾非特遣大
臣巡察難以祛除積弊直隸爲畿輔重地尤宜首先激清今應遣
大臣一員前往會同該撫巡歷地方有勢要豪強旗人莊頭大爲
民害者廉訪確實惡蹟指名題參重加懲處以儆奸徒用安良善
副朕移風易俗愛養民生至意應遣大臣爾部開列具奏○庚戌
以杭艾爲左都御史由盛京刑部侍郎遷○壬子以金世鑑爲內閣學士由

閣侍讀
學士遷

○乙卯以三逆蕩平遣內大臣奇塔特等分賚厄魯特噶

爾丹博碩克圖汗喀爾喀左翼土謝圖汗等部○丙辰予故江西

巡撫劉如漢祭葬○戊午平郡王羅可鐸薨 上輟朝一日子祭

葬諡曰比○辛酉以噶爾圖爲盛京刑部侍郎

由內閣
學士遷

○甲子召

岳州投誠新補南汝總兵官王度冲至瀛臺門 上問曰岳州陸

路兩次攻戰並湖中對敵情形爾在岳州知之宜悉逐一詳奏王

度冲奏曰岳州初戰賊眾被吳三桂誑稱滿洲兵力衰弱無知者

信從遂敢對敵以致被殺幾盡及滿兵二次攻取岳州賊兵藏在

鹿角楛牌內死拒被殺被傷者又甚於前故畏懼滿洲鋒銳再不

敢出賊戰船高大火器甚多必待順風始行出戰然每戰受傷失

船且吳應麒驕惡運道斷絕饋運不至屬下俱思離散又畏 皇

上天威遂率兵來投吳應麒無以自存故卽逃遁 上諭曰汝到

南汝任必須安輯兵民協和文武愛惜兵丁不可剋錢糧及生
事地方負朕任用之意○丙寅以喇巴克爲內閣學士

由內閣侍
讀學士遷

○戊辰子故左都御史達多祭葬○己巳彗星見井宿度尾長二

尺餘○辛未以郎廷樞爲廣東布政使

由按察使遷

○癸酉諭大學士

等天道關於人事彗星上見政事必有闕失其應行應革者令九
卿詹事科道會議以聞於是尙書介山侍郎沙賴科爾坤等奏請
安插裁汰各省兵丁令其得所尙書魏象樞奏請察裁兵中或有
效力行閒者不令裁汰尙書梁清標奏今天下太平凡事不宜開
端當以安靜爲主左都御史徐元文奏請暫停臺灣進勦侍郎杜
臻奏請全復浙省運丁裁扣錢糧漢給事中御史等奏請潼關收
稅免差少詹事及滿給事中等奏大同宣府宜設滿洲官兵則無
田產滿兵皆有裨益 上曰裁兵務使得所慎勿汰及效力之人

另降諭旨梁清標所言凡事不宜開端當安靜甚得爲治之要近
總督姚啟聖奏稱十月進剿臺灣可暫行停止俟十月後再行定
奪復運丁錢糧及免差潼關收稅令各所司議奏大同宣府設滿
洲官兵事宜令該部於議覆凱音布噶爾泰等條奏時一併確議
以聞又諭近觀凡事不論是非大小滿官則徇親戚朋友情面漢
官則徇同年門生情面相爲鑽營奔競者甚多從之則已拂之則
妄議謗訕然此皆存乎其人尤甚者科道官員條奏事宜原期除
弊及行其言後反滋弊爾等可將此傳諭九卿詹事科道官員
八月丙子朔諭大學士等學士乃內閣參贊政事之官如有所見
應行啟奏近來並無與議者若惟送本接本用一筆帖式足矣何
必設立學士此後各有所見俱令敷陳○戊寅 上幸玉泉山○
翰林院奏經筵講章得旨經筵所以講學修德大典也講章須有

勸戒箴規之意乃稱啟沃今講章內有道備君師功兼覆載二語太過其易之○御史拉塞奏天下已定除陝西近邊及沿海地方外其別省火器應概行禁止毋許存留得旨朕思治天下之道在政事之得失於火器無與夫火器孰有多於吳三桂者乎因其所行悖逆卽致滅亡觀此則火器之不足恃可知矣所奏不必行○奉使侍衛多爾濟扎卜台吉額林辰等至張家口外空郭爾鄂波之地遇厄魯特噶爾丹貢使薩拉巴圖爾問羅卜臧台吉爲喀爾喀扎薩克圖汗所執果有此事否其同來有布庫班第者係扎薩克圖汗之人對曰羅卜臧欲與鄂羅斯合謀攻我汗我汗遣其子率兵萬人於今歲二月終旬夜乘羅卜臧所廢執之其屬下人俱爲俘擄財物及馬駝牛羊俱爲我軍所獲我曾執纛隨行此目擊之事也多爾濟扎卜等據此奏報得旨羅卜臧台吉被執旣真爾

等攜賞物卽回○壬午 上還宮○癸未 上御經筵○召講官
牛紐陳廷敬至乾清宮諭曰大學士杜立德贊襄機密積有歲年
敬慎公忠實多勞績今請還鄉朕念老臣遠去親製詩章揮灑翰
墨爲一卷軸又書唐詩二軸及怡情洛社篆章一方墨刻二冊汝
等齋物以昭朕優禮眷顧之意又召牛紐等近御榻前指示所臨
法帖諭曰此黃庭堅書朕喜其清勁有秀氣每於暇時輒一臨摹
隨命取晉唐宋元明人字畫真蹟卷冊置榻上 上手自指點開
示或誦其文句至於終篇或詳其世代爵里事實論其是非成敗
美惡之迹至顏真卿書 上曰此魯公書嚴氣正性可想見其臨
難風節也○甲申 上幸玉泉山○乙酉御史戴玉縉奏 太祖
高皇帝 太宗文皇帝 世祖章皇帝聖訓應行纂修及比年以
來凡係用兵詔命密旨征勦機密並應編輯成書以垂不朽內閣

翰林院會議准行得旨 太祖 太宗 世祖聖訓垂法萬世關

繫重大理應纂修至朕所行之事編纂成書古人雖有其例尙於
朕心有歉爾等可將此意述與九卿確詢再奏○先是厄魯特噶
爾丹巴台吉之子鄂齊爾圖汗之孫羅卜臧滾布奏我祖父向曾
往來入貢後以內亂往依達賴喇嘛今幸得稍甯伏乞 皇上俯
鑒我等饑渴撫而恤之請率所轄居龍頭山之地理藩院轉奏得
旨此龍頭山在邊關何處自邊關行幾日可到與內地有關係否
或向係邊外無用之地否著卽檄拉篤祜察明原委作速奏報至
是拉篤祜覆奏蒙古稱龍頭山謂之阿喇克鄂拉乃甘州城北東
大山之脈絡綿衍邊境山之觀音山口卽邊關也距甘州城三十
里距山丹城三里其夏口城距山口而建自夏口城至湟川堡相
去五里山盡爲甯遠堡此在邊外龍頭山與甯遠堡相去里許其

聞有長甯湖界之蒙古所謂鄂爾通也甯遠堡有內地人民種植
輸賦沿途有兵民牧養今諸蒙古俱於龍頭山北游牧羅卜臧滾
布之意欲占長甯湖耳邊汎要地似不宜令不諳法紀之蒙古居
住理藩院兵部議以羅卜臧滾布所請應不准行從之○丙戌
上還宮○戊子大學士明珠等奏臣等奉旨傳集九卿將前戴玉
緡疏奏逐一與閱九卿等言 祖宗聖訓固應編輯至逆賊變亂
以來 皇上宵旰憂勤運籌決勝八年之間殲滅賊寇克奏膚功
復見昇平皆 皇上神明獨運指授方畧所致若不纂輯成書恐
鴻功偉績或有遺漏况古來帝王武功告成必將所行之事逐一
記載今宜如御史所請勒成一書以垂永久得旨眾議如此可著
編纂成書○庚寅初鄂羅斯所屬羅刹時肆掠黑龍江邊境又侵
入淨溪里烏喇諸處築室盤踞 上命大理寺卿明愛等諭令撤

回猶遷延不去而恃雅克薩城爲巢穴於其四旁耕種漁獵數擾索倫赫哲飛牙喀奇勒爾居民掠奪人口上遣副都統郎談公彭春等率兵往打虎兒索倫聲言捕鹿以覘其情形將行諭曰羅刹犯我黑龍江一帶侵擾虞人戕害居民昔發兵進討未獲翦除歷年已久近聞蔓延益甚過牛滿恒滾諸處至赫哲飛牙喀虞人住所殺掠不已爾等此行除自京遣往參領侍衛護軍外令畢力克圖等五台吉率科爾沁兵百人甯古塔副都統薩布素等率烏喇甯古塔兵八十人至打虎兒索倫一面遣人赴尼布潮諭以捕鹿之故一面詳視陸路近遠沿黑龍江行圍徑薄雅克薩城下勘其居址形勢度羅刹斷不敢出戰若以食物來饋其受而量答之萬一出戰姑勿交鋒但率眾引還朕別有區畫爾等選時須詳視自黑龍江至額蘇里舟行水路及已至額蘇里其路直通甯古塔

者更擇隨行之參領侍衛同薩布素往視之賜郎談彭春 御衣

弓矢隨行者亦量加賞賚○子故刑部右侍郎加禮部尚書銜葉

方謫祭葬加祭一次諡文敏○以胡戴仁爲廣東按察使由湖廣

○辛卯諭講官牛紐陳廷敬大學士馮溥效力有年請老歸里今

特賜詩一章適志東山篆章一方墨刻一冊爾等傳諭朕意朕聞

山東之仕於朝者大小固結彼此援引凡有涉於己私之事不顧

國家往往造爲議論彼倡此和務使有濟於私而後已又聞其居

鄉多擾害地方朕皆稔知其弊馮溥久在禁密之地歸里後可教

訓子孫務爲安靜故大學士衛周祚居鄉謹厚在閭里中若未嘗

任顯秩者必如此人方副朕優禮之意爾等偕侍衛二格往宣朕

旨○壬寅禮部議覆欽天監治理厯法南懷仁奏新法照各省北

極之高度另有推算日月交食表名爲九十度表惟盛京無本地

之表今春隨 駕測得盛京北極之高較京都多二度應照各省製九十度表以憑推算從之○福建總督姚啟聖奏閩省有綠旗兵又有漢軍甲兵進取臺灣防守地方業已足用大兵似宜撤回上命將軍喇哈達等盡率福建大兵還京師○刑部題逆賊譚宏案內譚天倫等九人應卽伏法得旨逆賊之子弟應照定例正法但其中有身與其事行惡者亦有無知牽累者若概置於法尙覺可憫譚天倫既係譚宏之子可卽正法陳樸等八人乃無知連累俱從寬免死撥與盛京披甲新滿洲爲奴○是月免直隸元城廣宗等十八縣旱災賦

九月乙巳朔諭內閣王進寶趙良棟當逆賊竊據漢中四川等處地方悉力固守在外領兵諸將咸以恢復爲難因特遣學士禱佛馳往傳諭從來漢將所轄地方猝有變亂卽用漢兵戡定原無待

借力於滿兵之事爾等皆封疆大臣久歷戎行應各率所隸部曲將士相機進取時趙良棟既首先倡議應行恢復隨允趙良棟議剋期進剿於是二人協力克取漢中王進寶自蘭州失守遂率兵乘筏渡河恢復蘭州鞏昌等處勦禦賊寇所向奏功及同取漢中之後二人意見不合嫌隙漸生遂爾分路進兵趙良棟直取成都王進寶恢復保甯若成都不下雖攻保甯未易卽拔若保甯未克則雖下成都難以固守勢必復退是伊等二人功績俱著封疆使能公爾忘私和衷共濟卽統士卒乘勝長驅則滇黔賊寇可以計日殄滅何復遷延歲月遲至一二年之久耶且二人既克成都保甯賊眾膽落遂悉其精銳入川抗拒雖中路空虛大兵得乘機進取沅州鎮遠貴陽等處而川中賊勢復張已恢之疆土幾至再陷此皆由不能和衷之所致也二人賦性鹵莽不諳大體各懷私忿

互相攻訐屢奏求勝交圖陷害朕當二人訐奏之初卽已洞悉情事念二人功績並茂惟欲保全絕無深究之意且一切投誠人員有免其前罪者有仍加錄用者况似此建功之臣耶今二人俱至京師如欲治罪何難逮問重處但朕意終以保全爲念特將二人互訐奏章俱行發還概不究問其遲於救援失陷地方關繫軍機等事者仍照例察議此非爲二人調解朕深維國家大體務欲保護勞臣用全終始故茲申諭自今以往其洗心滌慮各改前愆消釋私嫌共矢忠藎以副朕優待功臣至意且傳集議政王大臣九卿詹事科道等官先行宣示然後傳諭○戊申賜蔡升元等一百七十六人進士及第出身有差○己酉諭福建將軍佟國瑤國家設立督撫提鎮原以爲民向來駐防鎮江杭州福建等處漢軍官兵皆恣意妄爲侵占廬市擅放私債多買人口如哈喇庫諾邁等

止知營私罔遵法紀買人至盈千百此等匪人用之何益昔孟喬芳總督陝西李率泰總督福建時能潔己奉公愛民恤士秦閩人至今思之爾到地方宜恪遵國憲安戢兵民毋負朕委任至意○甲寅 上幸南苑行圍○京師地震○大理寺司務趙時楫奏

皇上宵旰精勤命部院全班奏事日集午門兢業咨儆誠太平萬世之基但諸臣每夜三更早起朝氣耗傷未免日閒辦事反難精密不若分班啟奏俾其精神遞相節養至於官員中有居住僻遠者有拮据輿馬者有徒行策蹇者及抱病勉行者或令滿漢正佐輪流或將朝期比前量爲增益以立不刊之典且 聖躬亦宜節勞平日本章但須封進其緊要事宜必須面陳者分班啟奏得旨著九卿詹事科道會議具奏○己未 上自南苑幸玉泉山駐驛○議政王大臣等議覆綬遠將軍雲南貴州總督蔡毓榮奏中甸

在金沙江之外舊係麗江土府所轄從未安兵設汛自吳逆謀叛將地方割與蒙番爲交好之計通商互市今互市雖經禁止而蒙番所設喇嘛營官尙未撤回欲議設兵撥防必驅其人復其地而後可據土知府木堯議稱願遣土人進藏致書達賴喇嘛宣示

皇上德威說令歸還原地且藉此往回之間寢彼番目前之狡謀備我師進取之實計應如所請遣土人宣示令歸還中甸地方再行奏聞從之○壬戌諭大學士等自用兵以來百姓供應煩苦朕前屢言俟天下蕩平將錢糧寬免爾等可同戶部先將天下錢糧出納之數通算啟奏至陝西一省供應較他省苦累加倍錢糧尤宜寬免○癸亥巴圖爾額爾克濟農奏厄魯特時值敗壞饑餓來歸蒙 皇上帡幪之庇得居邊境不意屬下人等不知法紀妄行盜竊悔罪無及除將厄爾德尼和碩齊所掠人口追還上納外其

竊馬人等窮困已極不能償還臣與眾屬裔極力捐輸共得馬百匹解送交納伏乞 聖主睿鑒又臣之屬裔貧苦無聊甯夏地方與臣相近伏懇 天恩許在甯夏貿易理藩院議應檄諭巴圖爾額爾克濟農將盜竊鄂爾多斯馬羣人等照彼例治罪缺解馬匹補償完日將巴圖爾額爾克濟農一併從重議處見解馬匹交發額爾多斯旗下其甯夏地方向無厄魯特喀爾喀貿易之例所請不准行得旨巴圖爾額爾克濟農等自本地敗奔來至邊境因不諳法紀迫於饑困盜竊牲畜等物今陳其苦情諄諄奏請可將追償缺解馬匹並議處之處俱行寬免仍移文嚴禁嗣後毋得違法妄行生事此文卽發拉篤祜轉行曉諭之○甲子大學士等遵旨議覆大理寺司務趙時楫奏部院奏事或令滿漢正佐輪流或將朝期量爲增益一疏臣等公議九卿詹事科道官員 皇上不時

召問議事應仍令每日上朝其餘無事官員及閒散衙門官員停其每日上朝照舊一月三次上朝又查自古人君從未嘗每日親御聽政卽定期視朝亦未有甚早者今因 皇上宵旰勤勞每早聽政故啟奏官員唯恐遲誤必四五鼓趨朝難免夜行風寒之苦若 皇上於辰刻視朝則遠居大小各官黎明而入亦不致遲誤上曰朕每日聽政自不可已若定時視朝可免庶僚早起風寒之累此言亦是黃機魏象樞皆年踰七旬不堪逐日趨走故具奏乞休已經留任伊等或遇勞頓及有恙時可令報知本部免其啟奏其餘官員如有疾病不能上朝啟奏者亦著報部爾等可傳諭九卿詹事科道官員觀眾意如何再行具奏○裁廣西桂林城守營守備一千總一增泗城營副將一左右二營守備各一○乙丑大學士等奏宣諭九卿各官皆云 皇上洞悉下情慮及下僚風

寒欲限時聽政卽同天地之心無不懼忭 上曰朕御朝太早各

官於三四鼓趨赴朝會殊爲勞瘁自今以後朕每日御朝聽政春夏以辰初初刻秋冬以辰正初刻爲期啟奏各官從容入奏九卿詹事科道原係會議官員仍每日於啟奏時齊集午門如有年力衰邁及偶患疾病俱回本衙門說明免其入奏齊集此外各衙門及部院司屬官員俱停其每日齊集著各赴本衙門辦事每月常朝仍應照舊行爾等可卽傳諭○丙寅 太宗文皇帝實錄成○安南國王嗣黎維正奏臣親兄黎維禎於乙卯年三月內違世臣俯徇輿情權理國事以中國適有外警下情難以上達茲值貢期備因陳奏得旨安南國王嗣黎維禎會進貢克效悃誠遽爾奄逝深可憫惻應得恩卹著察例議奏○戊辰諭刑部朕閱三法司會奏人命事強盜罪案甚多按律凡強盜情實務行梟示強盜情罪

固爲可惡較之反叛重案猶屬稍輕向來反叛牽連之人尙有擬死罪而不行梟示者此等關繫人命大辟朕每欲得良策澈清本源使遠近清平永行遵守近見光棍事案較前差少惟強盜一事常厯朕懷未能卽得良法夫人非至窮迫孰肯甘爲盜賊每見盜案有獲賊甚少牽連多人此類若不置之重典則匪人不知畏懼無以儆戒將來若概置重典朕心又復惻然此皆不得澈清本源之道故致如此耳今如何使盜賊屏息良善獲安爾等會同三法司詳議以聞○癸酉 上以翰林院學士張英內廷供奉敬慎勤勞今告假回籍營葬伊父張秉彝命照張英見在學士品級賜卹致祭○戶部保舉關差官員蘇赫臣等辦事有才 上曰凡部院司官果能謹慎奉職方不僨事如蘇赫臣等及科臣莫羅輩俱狂妄自恃雖有才幹亦無足取可另行保舉以聞○是月免浙江富

陽等十一縣所旱災江南沈陽宿遷江西甯州進賢等五州縣衛湖廣黃梅廣濟蘄州山東長山新城水災額賦有差

冬十月乙亥裁江南分守鎮江道分巡徽甯道山東分巡驛傳道陝西分守關西道關南道分巡驛傳道浙江分巡杭嚴道江西分守湖西道湖東道廣東分守嶺西道嶺東道羅定道分巡雷廉道嶺南道廣西分守蒼梧道江左道分巡桂平道江右道鬱林道四川分守督糧道貴州分守桂東道雲南分守臨元道洱海道○丁丑大學士等奏臣等遵諭同三法司會議強盜係劫掠良善爲惡之徒如不置之重典則匪類無所畏懼欲求澄清本源之道又無良策惟厚風俗崇節儉庶幾盜風可息得旨強盜罪案關繫人命爾等會同九卿務求甯息盜賊以安良民之處詳議以聞○廣西提督趙應奎以疾乞休得旨前吳三桂叛逆時各處乘勢震動是

時趙應奎以一副將孤身堅守袁州於是眾心始定袁州係緊要城池儻或失陷江西全省恐亦難保此人功績甚大朕聞其病勢危篤深爲憫惻著趙應奎子督捕理事官趙衍祥馳驛往省其父以見朕優恤至意○己卯福建提督施琅奏臣於水師營中簡精兵二萬餘戰船三百艘已足破滅海寇請令督撫趕辦糧餉給臣軍而獨任臣以討賊無拘時日臣整理舟師時加操練但遇風利即可進兵得旨進勦海寇關繫緊要著該督撫同心協力催趨糧餉勿致遲誤前姚啟聖具題功罪定例交與施琅遵行海寇固無能爲鄭錦在時猶苟延抗拒鄭錦死首寇旣除餘黨彼此稽疑各不相下眾皆離心乘此撲滅甚易施琅相機自行進勦極爲合宜○庚辰賜王繼先等一百八人武進士及第出身有差○甲申定遠平寇大將軍貝子章泰征南大將軍都統賴塔凱旋 上率羣

臣郊勞之○乙酉勘閱河工戶部尙書伊桑阿等奏臣等奉命前往黃河將兩岸隄工逐段丈量所築隄工及減水壩等處有不堅固不合式者俱一一註明冊內聽工部查覈外查河道關繫運道民生富軍需浩繁之際該督題請大修河道一勞永逸 皇上特允所請給銀二百五十一萬餘兩令其修治一切事宜俱照該督所題准行今限期已逾錢糧俱已用過見在蕭家渡決口九十餘丈宿遷流陽等處田地淹沒黃河不歸故道本年糧艘雖已北上將來運道尙屬可虞至所修工程多有不堅固不合式之處與一勞永逸之言大不相符應將該督並監修各官交與該部從重治罪其不堅固不合式等處責令賠修得旨九卿詹事科道會議具奏伊桑阿等又奏臣等帶領崔維雅將黃河兩岸隄工並歸仁隄高家堰運河阜河等處看畢回至徐州會同河道總督靳輔公議

將崔維雅條陳二十四款隨問靳輔靳輔逐款登答兩人各執己見靳輔係專管治河之人限期已滿迄無成效其言難以再信若照崔維雅所議另行修築亦難保必能成功河道關繫重大兩人所議懸絕臣等難以定議因將崔維雅靳輔所議之處逐款對寫繕奏具題得旨九卿詹事科道會議具奏○丁亥綏遠將軍雲南貴州總督蔡毓榮奏滇省漢土交錯最稱難治自吳逆搆叛悉徵土兵濫加品秩迫我大兵深入大將軍等鼓舞招徠各照偽銜換給劄付係一時權宜今已廓清請將所給銜劄追繳各照應襲職銜量加一等服色下部議行○河道總督靳輔奏江南河道在康熙十五年以前敝壞至極蒙 皇上俯念運道關繫民生當軍興需餉之候特奮乾斷不惜正帑命臣大爲修治臣欽遵竭蹶經今五年原估續估工俱次第告竣不意又有蕭家渡民隄坐陷一事

以致黃流旁洩者十居其七仍未歸還故道此皆臣無識無才綢繆不善悔恨靡甯者也但河道全局已成十之八九止有楊家莊以下一百四十五里河身未經大通蕭家渡新決口未經堵塞見在一面繕奏估計一面設法興舉據臣之愚必可無誤乃候補布政使崔維雅將臣數年來請旨建築如許工程紛紛議拆議毀臣驚駭恐懼萬難緘默除崔維雅條議二十四款登答明白移送欽差大臣科道聽其覆旨外復念蕭家渡雖有決口而海口大關下流疏通河道腹心之患已除堵塞此口其事實易斷不宜有所更張以隳成功而釀後患得旨九卿詹事科道會同一併議奏○戊子議政王大臣九卿詹事科道等奏會議強盜分別首從一案刑部尚書郭四海奏曰皇上好生如天故欲將強盜分別首從以寓哀矜至意諸王及臣等皆以爲可行惟漢戶部尚書梁清標等

以爲強盜原係兇惡不良之徒若從寬典恐盜案滋多故後議諸臣再行面奏伏候 聖裁 上曰爾等後議之意若何梁清標奏曰 皇上法外施仁原屬至美之事但臣等以強盜皆係兇惡難分首從若行分別有司反得上下其手或罪果可矜 皇上閒行寬免則伊輩自感再生之恩若豫定一例則伊輩將僥倖於不死而愈恣爲盜 上曰論理本無可寬第朕見每歲盜案處決甚多而究其所劫之物甚微豈盡甘於爲盜或亦飢寒所迫朕心深爲憐憫思立一法以弭盜源故與爾等商之耳左都御史徐元文奏曰此等古來原不待教而誅按律竊盜三次者比照強盜例處絞而強盜行劫或兩三次後發覺者甚眾今若從寬是竊盜反重於強盜矣 上曰爾等所言極是九卿出 上顧學士牛紐曰直隸各省盜案每歲處決甚多朕心不忍故止傳口諭與諸臣商議原

非有必行之意適九卿所奏極是爾可將朕旨傳諭之○己丑大學士勒德洪等奏昨將 聖諭傳九卿皆云 皇上納言如流千古未有臣等不勝歡慶 上曰朕前所諭欲於應死之中求可生

之路故令諸臣會商至當原非必以為當然也九卿兩次執奏甚善凡事既知其理即能如此力行何事不治若但順從不復察理

豈不負朕委任耶爾等將朕旨傳諭九卿皆令知之○以黃機為文華殿大學士由吏部尚書遷吳正治為武英殿大學士由禮部尚書遷○于故

原任浙江巡撫李本晟祭葬○命停本年秋決可矜者減等發落○庚寅諭九卿詹事科道等河工關繫國計民生甚為緊要朕時

時在念今爾等所議若何工部尚書薩穆哈等奏曰蕭家渡決口應令靳輔賠修 上曰修治河工所需錢糧甚多靳輔果能賠修

耶如必令賠修萬一貽誤漕運奈何朕思河工一事治淮尚易黃

河身高於岸施工甚難先是崔維雅條奏二十四款朕初覽時似有可取及覽靳輔回奏則崔維雅所奏事宜甚屬難行爾等可有定見良策否戶部尚書伊桑阿奏曰靳輔身任河工已經五六年必有確見似宜令其回京面奏再行詳議定奪 上曰此本姑留

內閣俟靳輔來京爾等會同再行確議具奏○以杭艾爲兵部尚

書

御史左前○辛卯重修

太祖高皇帝實錄○纂修 三朝聖訓

及平定三逆神武方畧○議政王大臣等議吳丹遲延失救永甯應革去護軍統領佐領籍沒家產鞭一百不准折贖其未分家之子一併入辛者庫鄂克濟哈既失救永甯又將建昌失陷應革一等侍衛籍沒家產趙良棟應革將軍總督得旨吳丹鄂克濟哈之罪相同無甚分別吳丹所議稍過吳丹著免入辛者庫鞭責與鄂克濟哈一例定罪趙良棟首先進取漢中四川著有功績著寬免

革職補鑿儀衛鑿儀使至趙良棟之罪不止於此伊每參人搶劫良民卻自縱兵掠民又擅責滿洲護軍若此等事深究其罪尙重但朕欲始終保全功臣故寬赦耳○壬辰 上啟鑿謁 孝陵○

丙申 上謁

孝陵

○丁酉調朱德宜爲吏部尙書

由兵部調

以沙澄

爲禮部尙書

原任

喀爾圖爲左都御史

由倉場侍郎遷

○兵部奏議敘應升

京堂刑部郎中姚儀奉有才幹素優准改武職之旨查郎中與參領對品參領旣以總兵官用郎中姚儀應授爲都督僉事以總兵官推用從之○是月免山東鄒平江南安東水災山西清源縣平定州旱災額賦有差

十一月丁未

上還次湯泉○發大同宣府粟賑四子部落蘇尼

特饑○庚戌

上回鑾○辛亥禮部奏安南國王嗣黎維正進貢

金銀器皿與本內數目缺少不符得旨外國貢獻其物本無足重

特以傾心向化誠意可嘉耳金銀器皿短少乃是細事其餘各種

物件爾部亦酌減定例尋部議嗣後免其進白絹降眞香白水香

中黑綾香等物從之○壬子 上還宮○甲寅以李之芳爲兵部

尙書由浙江總督遷○命吏部侍郎覺羅沙賴以原銜管倉場侍郎事○

乙卯四川巡撫杭愛奏康熙十一年分前任撫臣羅森報開墾地

共五千六百一頃四十畝查係羅森希圖議敘捏報非實在開墾

應徵錢糧仰請豁免部議不准得旨這捏報墾地錢糧著照該撫

所題豁免○丙辰河道總督靳輔而奏蕭家渡工程至來歲正月

必可告竣其餘隄工須銀一百二十萬可以全完 上曰爾從前

所築決口楊家莊報完復有徐家溝徐家溝報完復有蕭家渡河

道衝決爾總不能豫料今蕭家渡既築之後他處爾能保其不決

乎前此既不足憑將來豈復可信河工事理重大乃民生運道所

關自當始終酌算備收成效不可恃一己之見靳輔奏云總之人
事未盡若人事盡則天意亦或可回 上曰前崔維雅條奏等事
亦有可行者否靳輔奏云所奏起夫挑濬每日用夫四十萬自各
省遠來尤爲不便必不可行又稱河隄以十二丈爲率亦不便行
河隄須因地勢高下有應十五丈者有應七八丈者豈能一概定
其丈尺 上曰崔維雅所奏無可行者靳輔退 上諭大學士等
靳輔胸無成算僅以口辯取給執一己之見所見甚小其何能底
績大學士勒德洪等奏云誠如 聖諭 上曰海運可行與否再
著九卿科道議○賜雲南陣亡把總傅應龍卹廕○戊午轉科爾
坤爲吏部左侍郎調禧佛爲吏部右侍郎由兵部調○吏部奏王輔臣
雖經投誠但曾從逆受僞職應革去原有之三等精奇尼哈番不
准承襲從之○命立雙忠祠於廣西祀殉難巡撫馬雄鎮傅宏烈

○庚申大學士等同戶部尙書伊桑阿等覆奏海運事宜伊桑阿奏曰黃河運道非獨有濟漕糧卽商賈百貨皆賴此通行實國家急務在所必治至海運先需造船所需錢糧不貲而膠萊諸河停運年久諒已淤塞若從事海運又當興工開濬其費益大據臣等之意似屬難行得旨是九卿等會議尙書伊桑阿察勘河工一疏查冊開不堅固不台式隄工共一萬五千餘丈漏水隄工四千餘丈及減水壩二座不堅固之處應將河道總督靳輔卽行從重治罪但康熙二十年四月內已將靳輔革職戴罪督修且該督奏稱蕭家渡雖被衝決海口大闢下流疏通此口堵塞亦易應暫停處分將監修各官俱行革職戴罪賠修若仍踐前轍將該督並監修各官加倍從重治罪不得濫派民間限六箇月修竣得旨靳輔仍著革職戴罪督修修築各官俱著革職戴罪監修勒限將蕭家渡

決口堵塞但河工關係重大所需錢糧浩繁若責令賠修恐致貽
誤仍准動用錢糧勿得借端科派擾累小民又議崔維雅所議修
築需用錢糧甚多而河道難保其必能疏濬應將崔維雅條奏二
十四款毋庸議從之○裁山東沂州鎮總兵官改鎮標左營爲膠
州營後營爲沂州營各設副將一前營爲臺莊營設遊擊一將右
營裁去共裁遊擊二千把總各二○戊辰調庫勒納爲兵部右侍
郎由刑部調○以施維翰爲浙江總督由山東巡撫遷○命左副都御史塞克
德馬世濟督造漕船○己巳以崔維雅爲廣西布政使原任湖南布政使
○庚午 上御乾清宮講官進講夬卦畢 上顧講官曰從來君
子得志猶能容小人小人得志必不肯容君子講官等奏曰誠如
聖諭○壬申兵部以問取長沙軍罪口供啟奏得旨康熙十六
年三月初一日長沙攻戰朕知之甚悉度其勢安親王官兵與穆

占官兵互相樹敵前穆占詣長沙於三月初一日率兵逼近長沙
城池逆賊出城擺列挨牌烏槍迎敵我軍前鋒殺敗逆賊直抵城
下其護軍驍騎官兵已尾隨前進彼時報知安親王官兵不暇甲
胄或十或二十不成隊列隨到亟進我軍陣所去長沙城其間有
一小河我軍臨戰時已被損傷在河溺水陣亡者甚多其故如此
此兩路應分晰問取口供

十二月乙亥轉金鼎爲工部左侍郎以金世鑑爲工部右侍郎

由內閣學士遷○以鄂哈爲刑部右侍郎

由光祿寺卿遷

○以李天浴爲山東巡撫

原任雲南巡撫○已卯 上幸南苑行圍○庚辰議政王大臣等議原任

廣西巡撫陳洪明從賊應革職立絞得旨陳洪明前赴任時朕召
至乾清門奏稱臣一介草茅蒙 皇上簡任務期勉效愚誠以報
知遇及粵東被陷朕尙意此人未肯從賊且彼並無父母妻子牽

制之情隻身何難自拔而乃深負國恩受賊僞職又具啟與吳三桂情殊可惡理應正法姑從寬免死著流徙甯古塔籍其家○大學士等奏安親王岳樂以軍機議罪 上曰安親王遭護衛雅圖來奏將三月初一攻取長沙我兵受傷情節曾經口奏其石匣失機緣由亦未隱諱據實奏聞勒德洪明珠阿蘭泰可詣會議處將安親王並護衛雅圖傳來問明具奏○辛巳子故兵部尚書折爾肯祭葬○壬午諭兵部國家撫定寰區削平逆亂必資將士之力我 太祖 太宗訓誥戎兵申嚴紀律信賞必罰懲勸維彰其時行閒將帥爭自奮勵所向奏功後因歷年既久奉行少寬人情不無怠弛朕御極以來恪守 祖宗成憲每於戎政兵機加意整飭自逆賊叛亂各路將帥統兵征勦行閒功罪屢經奏報朕念我國家軍法自昔嚴明稽覈殿最務從詳確頻頒詔旨炳如日星今逆

賊殄滅武功告成振旅班師正分別功罪昭示懲勸之時因思軍法固不可寬功罪自宜相抵必酌量重輕情法允協庶俾羣心悅服激厲將來凱旋大兵將帥內見在應議者有直抵雲南建立功績人員應詳察功過准其相抵雖未至雲南果立有大功亦應準抵其未至雲南及並無大功者仍照軍法處分爾部卽遵諭行○兵部議覆雲南貴州總督蔡毓榮奏請禁民人及土司攜藏兵器並不許漢人將鉛硝硫磺貨與夷人應如所請得旨眾土司人等全賴弩弓長槍捕獵以爲生計今概行禁止則土司俱失其生業治民惟在所司官撫綏安戢若不愛惜兵民肆其殘虐民操白梃亦可爲非九卿詳議以聞○癸未九卿會議雲南貴州總督蔡毓榮條奏土司事宜諭大學士等此內土司承襲事宜似屬有理昔吳三桂未叛時構怨征討水西曾滅土司安坤其妻率所屬奔於

烏蒙地方後生子安世宗今此子尙幼朕觀平越黔西威甯大定四府土司原屬苗蠻與民不同以土司專轄方爲至便又諭大兵進取雲南此土司會前來接濟著有勤勞爾等可傳出征大將軍貝子章泰都統賴塔等詢問情形來奏○以金汝祥爲內閣學士

由內閣侍讀學士遷

○甲申戶部會同內務府議山海關外大凌河地方展

拓牧場事宜 上問曰爾等所看牧地內有民田否管牧御馬侍衛馬錫奏曰圈內亦有民田 上曰民居村落若何可有墳塋否馬錫奏曰每村或十數家或二三十家共有六十餘村居住年久亦有墳塋 上曰小民居住年久邱墓已成今若圈爲牧場遽令遷移必致失所朕心不忍應將民地盡行開除○子廣東殉難干總何亮卹廕○子故禮部侍郎史大成祭葬○戊子 上問大學士等達海巴克什子孫有登仕籍者否大學士明珠奏曰聞有一

孫見在鴻臚寺官其餘不知 上曰達海始作滿書大有裨於文
治其子孫理應錄用爾等詢明來奏尋吏部將達海巴克什親孫
參領陳布錄等十二人引見得旨陳布錄著以刑部郎中用○辛
卯裁江西提督廣信總兵官仍設南瑞總兵官一○壬辰諭大學
士勒德洪等國子監乃國家養育人才之所近聞司教之官不將
監生嚴加約束教誨縱之游戲又其甚者閒雜之徒任行出入竟
以國子監爲游戲之地矣爾等祭酒司業等官嚴行申飭○癸巳
議政王大臣等奏安親王岳樂軍機議罪得旨和碩安親王岳樂
身係主將賊自長沙出戰不能摧鋒致陣亡七十餘人骸骨未收
失陷造船物件但功罪相抵從寬免革議政宗人府罰俸一年○
議政王大臣等奏康親王傑書軍機議罪得旨和碩康親王傑書
率領大兵前往浙江不能剿滅賊寇平定地方以慰朕懷但於杭

州金華優游駐紮數年徒費糧餉著削去軍功罰俸一年○議政
王大臣等奏簡親王喇布軍機議罪得旨和碩簡親王喇布身爲
大將軍征勦江西不知豫爲調度以致螺子山等處失利著削去
王爵○江甯巡撫余國柱奏江鎮道已經奉裁但地方緊要與其
裁江鎮道無甯裁蘇松道以常州一郡並隸江鎮道其蘇松二郡
比江安糧道帶管池太道之例令江蘇糧道帶管庶江鎮得彈壓
之官蘇松無廢事之慮下部議行○于故禮部尙書管刑部尙書
事郭四海祭葬諡文敏○甲午副都統郎談等自打虎兒索倫還
以羅刹情形具奏諭議政王大臣等據郎談等奏攻取羅刹甚易
發兵三千足矣朕意亦以爲然第兵非善事宜暫停攻取調烏喇
甯古塔兵一千五百並製造船艦發紅衣礮鳥槍及演習之人於
黑龍江呼馬爾二處建立木城與之對壘相機舉行所需軍糧取

諸科爾沁十旗及席北烏喇之官屯約可得一萬二千石可支三年且我兵一至卽行耕種不至匱乏黑龍江城距索倫村不遠五宿可到其閒設一驛俟我兵將至淨溪里烏喇令索倫接濟牛羊甚有裨益如此則羅刹不得納我逋逃而彼之逋逃者且絡繹來歸自不能久存矣其命甯古塔將軍巴海副都統薩布素統兵往駐黑龍江呼馬爾○是月免直隸唐山等十一縣湖北沔陽等十州縣衛江西宜春等十縣衛所被災額賦有差○是歲朝鮮安南來貢○人丁戶口一千九百四十三萬二千七百五十三田地山蕩畦地五百五十二萬三千五百六十八頃八十四畝有奇徵銀二千六百三十三萬一千六百五十八兩有奇米豆麥六百三十四萬一千三百九十四石八斗有奇草二百二十九萬八千一百六十三束茶十五萬九千二百一十五引行鹽四百三十五萬六

千一百五十引徵課銀二百七十六萬一千二百五十八兩有奇
鑄錢二萬九千四百八十五萬一千四百八十有奇